

## **"Službeni glasnik BiH", broj: 72/11**

Na osnovu čl. 16. i 17. stav 2. i člana 72. Zakona o hrani ("Službeni glasnik BiH", broj 50/04) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine, u saradnji s nadležnim organima entiteta i Brčko Distrikta Bosne i Hercegovine, na 151. sjednici održanoj 25. maja 2011. godine, donijelo je

### **PRAVILNIK O NEŽELJENIM SUPSTANCAMA U HRANI ZA ŽIVOTINJE**

#### Član 1.

(Predmet)

Ovim pravilnikom propisuju se posebni uslovi za higijenu hrane za životinje koji se odnose na prisustvo neželjenih supstanci u hrani za životinje.

#### Član 2.

(Definicije)

Za potrebe ovog pravilnika koriste se sljedeće definicije:

- a) hrana za životinje - proizvodi biljnog ili životinjskog porijekla, u njihovom prirodnom stanju, svježi ili konzervirani i proizvodi dobiveni iz njihove industrijske prerade, te organske ili anorganske supstance koje se koriste pojedinačno ili u mješavinama, sa ili bez aditiva u hrani za životinje, za peroralnu ishranu životinja;
- b) krmiva - proizvodi biljnog ili životinjskog porijekla u izvornom obliku, svježi ili konzervirani i proizvodi dobiveni njihovom industrijskom preradom i organske ili anorganske supstance, sa ili bez aditiva u hrani za životinje, za peroralnu ishranu životinja ili direktno kao takvi ili nakon prerade za pripremu krmnih smjesa ili kao supstrati za premikse;
- c) aditivi u hrani za životinje - u skladu s posebnim propisom o aditivima u hrani za životinje;
- d) premiksi - mješavine aditiva u hrani za životinje ili mješavine jednog ili više aditiva u hrani za životinje sa supstancama koje se koriste kao nosači, namijenjeni za proizvodnju hrane za životinje;
- e) krmna smjesa - mješavina krmiva sa ili bez aditiva u hrani za životinje namijenjena peroralnoj ishrani životinja u obliku potpune ili dopunske krmne smjese;
- f) dopunska krmna smjesa - mješavina hrane za životinje s visokim udjelom pojedinih sastojaka koja je zbog svog sastava dovoljna za dnevni obrok samo ako se koristi u kombinaciji s drugom hranom za životinje;
- g) potpuna krmna smjesa - mješavina hrane za životinje koja je zbog svog sastava dovoljna za dnevni obrok;
- h) proizvodi namijenjeni za hranu za životinje - krmiva, premiksi, aditivi hrani za životinje, hrana za životinje i svi drugi proizvodi namijenjeni ishrani ili koji se koriste kao hrana za životinje;
- i) dnevni obrok - prosjek ukupne količine hrane za životinje, preračunate na 12% udjela vlage, koji predstavlja dnevnu potrebu životinje određene vrste, dobne kategorije i proizvodnosti, koji je potreban za zadovoljavanje svih njenih potreba;
- j) životinje - životinjske vrste koje se uobičajeno hrane i drže ili koriste za ishranu ljudi, kao i životinje koje žive slobodno u divljini u slučajevima kada se hrane hranom za životinje;
- k) stavljanje na tržište - držanje proizvoda za hranu za životinje u svrhu prodaje, uključujući ponudu za prodaju ili bilo koji oblik prijenosa trećoj strani, bez obzira na to da li je naplatan ili ne, te prodaju i druge oblike prijenosa kao takve;
- l) neželjene supstance - bilo koja supstanca ili proizvod osim patogenih mikroorganizama, koja je prisutna u i/ili na proizvodu namijenjenom za hranu za životinje i koja predstavlja potencijalnu opasnost za zdravlje životinja, ljudi, okoliš ili može negativno uticati na stočarsku proizvodnju;
- m) nadležni organi su organi utvrđeni članom 3. tačka 7. Zakona o hrani ("Službeni glasnik BiH", broj 50/04).

#### Član 3.

(Stavljanje na tržište)

- (1) Proizvodi namijenjeni za hranu za životinje smiju se uvoziti, stavljeni na tržište i/ili koristiti ako su zdravstveno ispravni, nepatvoreni i tržišnog kvaliteta, te ako pravilnim korištenjem ne predstavljaju opasnost za zdravlje ljudi, životinja ili okoliš i nemaju nikakav negativan uticaj na stočarsku proizvodnju.
- (2) Smatra se da proizvodi namijenjeni za hranu za životinje ne zadovoljavaju zahtjeve iz stava (1) ovog člana ako prisustvo neželjenih supstanci u navedenim proizvodima prelazi maksimalno dozvoljene količine ( u daljnjem tekstu: MDK) određene u Aneksu I. ovog pravilnika.

## "Službeni glasnik BiH", broj: 72/11

### Član 4.

(Prisustvo neželjenih supstanci)

- (1) Dozvoljeno je prisustvo neželjenih supstanci navedenih u Aneksu I. ovog pravilnika u proizvodima namijenjenim za hranu za životinje isključivo u skladu sa zahtjevima iz Aneksa I. ovog pravilnika.
- (2) U svrhu smanjenja ili uklanjanja izvora neželjenih supstanci u proizvodima namijenjenim za hranu za životinje, nadležni organi u saradnji sa subjektima u poslovanju s hranom za životinje utvrđuju izvore neželjenih supstanci u hrani za životinje u slučajevima kada su MDK prekoračene i u slučajevima kada je to prekoračenje utvrđeno, uzimajući u obzir prirodne količine tih supstanci u proizvodima namijenjenim za hranu za životinje.
- (3) Pragovi za pokretanje postupka i način postupanja kod utvrđivanja izvora pojedinih neželjenih supstanci iz stava (2) ovog člana, u slučaju prekoračenja MDK navedeni su u Aneksu II. ovog pravilnika.
- (4) Spisak supstanci zabranjenih za korištenje u ishrani životinja naveden je u Aneksu III. ovog pravilnika.

### Član 5.

(Zabrana miješanja)

Proizvode namijenjene za hranu za životinje, koji sadrže neželjene supstance u količini većoj od MDK propisanih u Aneksu I. ovog pravilnika, zabranjeno je miješati u svrhu njihovog razrjeđenja sa istim ili drugim proizvodima namijenjenim za hranu za životinje.

### Član 6.

(Dopunske krmne smjese)

Dopunske krmne smjese ne smiju, uzimajući u obzir omjer propisan za njihovo korištenje u dnevnom obroku, sadržavati količine neželjenih supstanci navedenih u Aneksu I. ovog pravilnika koje prekoračuju one utvrđene za potpune krmne smjese.

### Član 7.

(Nova saznanja)

Na osnovu novih informacija ili ponovnog razmatranja postojećih informacija nakon stupanja na snagu ovog pravilnika, a koje ukazuju da MDK utvrđene u Aneksu I. ovog pravilnika ili neželjena supstanca koja nije navedena u Aneksu I. ovog pravilnika predstavljaju opasnost za zdravlje životinja ili ljudi ili za okoliš, nadležni organi mogu privremeno smanjiti postojeću MDK, utvrditi MDK ili zabraniti prisustvo takve neželjene supstance u proizvodima namijenjenim za hranu za životinje.

### Član 8.

(Kriteriji za detoksikaciju)

- (1) Nadležni organ može odrediti dodatne kriterije prihvatljivosti detoksikacijskog procesa kao dopunu kriterijima utvrđenim za proizvode namijenjene za hranu za životinje koji su bili podvrgnuti takvom procesu.
- (2) Nadležni organi provode mjere nadzora i kontrole nad provedenim postupkom detoksikacije iz stava (1) ovog člana i kontrole MDK neželjenih supstanci u detoksiciranim proizvodima namijenjenim za hranu za životinje u skladu s Aneksom I. ovog pravilnika.

### Član 9.

(Aneksi)

Aneksi I., II. i III. sastavni su dio ovog pravilnika.

### Član 10.

(Prestanak važenja propisa)

Danom stupanja na snagu ovog pravilnika prestaje važiti Pravilnik o maksimalnim količinama štetnih materija i sastojaka u stočnoj hrani ("Službeni list SFRJ", broj 2/90) i ("Službenilist RBiH", broj 2/92).

### Član 11.

(Stupanje na snagu i primjena)

Ovaj pravilnik stupa na snagu osmog dana od dana objavljivanja u "Službenom glasniku BiH".

VMbroj 119/11 Predsjedavajući Vijeća ministara BiH Dr. **Nikola Špirić**, s.r.  
25. maja 2011. godine Sarajevo